

**Inuit A-nik akissarsiaqartut 1. januar 2014 aallarnerfigalugu sulinerminnut ilanngaatisiaqalernissaat siunertaralugu Akileraartarnermut inatsisip allanngortinnissaata eqqunnissaanut aningaasalersornissaanullu tunngavissamik nassuiaammik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat saqqummiunneqassaaq Inatsisartut 2013-imi upernaakkut ataatsimiinneranni, taamaasilluni aliangiinnermut ilanngaatip eqqunnerata aningaasatigut kingunissai 2014-imut Aningaasanut Inatsisissamut atatillugu tullerriarinnermi ilanngunneqarsinnaaniassammata. (Inatsisartunut ilaasortaq Andreas Uldum, Demokraatit)**

## **Akissuteqaat**

### **Siullermeerineq**

Aallaqqaasiutigalugu siunnersuutigineqartoq qujassutigerusuppara. Siunnersuuteqartup siunnersuuteqarnermini tunngavilersuutigaa, sulinerup kajuminnarnerulernissaa. Naalakkersuisut isumaqarput, akileraariaaseqartariaqartugut isumannaatumik sulisoqarnermi ilinniartitaanermilu iliuuserisanut ikorfartuutaasumik inunnillu amerlanerusunik sulisoqarnermi peqataanerulersitsisumik.

Sulinermi ilanngaat tamatuma angunissaanut immaqa isumassarsiatsialaasinnaavoq. Akileraartariaaserli kisiat qissimigaarlugu ajornartorsiut aaqqinneqarsinnaanngimmat taamatut pisoqarnavianngilaq. Ajornartorsiut tassaavoq, amerlasuut pisortanit ikiorsiissutinik pisartut, akikitsumik meeqqerivinnut akiliuteqartartut, ineqarnermut sillimmasiissutisartut, pilersuisutut tapiissutisartut il. il. suliffeqalissagaluarunik qaffasinnerusumilluunniit isertitaqalissagaluarunik tamakkiisumik ilaannakortumilluunniit tapiissutit taakkua ilaannik annaasaqartussaanerat. Inunnt taakkununga tamakkiisumik ilaannakortumilluunniit sulinermi pissarsiaq anikippallaaqaq.

Tamatununga pissutaavoq, akileraartit ikiorsiissutillu imminnut ataqatigiissilluarniarerat ajornartorsiutigigatsigu.

Ajornartorsiut pilersarpoq, akileraariaatsip inunnillu isumaginninnermi isumannaallisaatit avissartillugit aaqqissuussaasut ataatsimoortillugit immikkoortillugilluunniit atornerisa innuttaasut periarfissaannik aammalu nammineerlutik suliffeqarlutik pisortanillu ikiorserneqaratik kiffaanngisuseqarlutik inuunissaminnut kajumissuseqalernissaat eqqarsaatigilluarneqarsimanngimmat.

Ajornartorsiut tamanna inunnik isumaginninnermi, ineqarnermi akileraartarnermilu aaqqissuusseqqinnermut 2014-2015-imut pisussatut naatsorsuutigineqartumut atatillugu. Tassani sulinermi ilanngaat aaqqissuusseqqinnerit ilaattut ilanngunneqarsinnaavoq. Taamaattumik sulinermi ilanngaatip aaqqissuusseqqinnermut annertuumut ilanngunneqarnissaa pissusissamisoornerussaaq piffissaliunneqarsimasumut malinnaatillugu.

Aaqqissuusseqqinnernut taaneqartunut atatillugu Naalakkersuisut sulisoqarnermi kattuffiit sulinermi ilanngaatip atuutsinneqalersinnaanera pillugu periarfissaq eqqartorniarlugit suleqatigiinneq aallartissimavaat. Suliap taassuma inernerit aaqqissuussinerit saqqummiunneqarnissaat sioqqullugu Inatsisartunut nassuiaammik saqqummiussinissaaq pissusissamisuussaqaq.

Taamaattumik Naalackersuisut Inatsisartut upernaamut ataatsimiinnissaanni nassuiaammik agguassissapput, tassanilu sulinermi ilanngaat pillugu periarfissat nassuiarneqarumaarput. Nassuiaatip imassaata ilagissavaa, sulinermi ilanngaat amerlanerusut sulilersinnissaannut iluaqutaassanersoq, taamaassappallu 1. januar 2014 imaluunniit kingusinnerusukkut akileraartarnermut, ineqarnermut inunnillu isumaginninnermut politikkimut tunngasutigut allangortiterinernut ataatsimoortunut aatsaat ilaatinneqarluni atuutsinneqalissanersoq.

Taamatut oqaaseqarlunga, Naalackersuisut sinnerlugit siunnersuutip akuerineqarnissaa inassutigaa-ra.